





春秋孔



欽定四庫全書



六經皆聖人之書也。雖然未可

概也。書之云書。遠稽也。詩之為

詩。廣稽也。禮云禮樂。樂云樂。雜出

。若公孫制氏輩而未可



準也。獨十翼研於觀象五例。業自特書。兩者又皆宗國之守藏。即晉籍父齊南史罔與因焉。故韓起聘魯。觀書太史。見易象與魯春秋。有周禮在魯之歎。孔子起而暢厥大旨。則望義知歸。非孔子安以哉。後世學者奉古之心。終不勝好異之心。迺是意見橫生。義理巧出。大圭呂氏。以為六經之不明。諸儒穿鑿害之。而



春秋為尤甚。將去其甚奈何。在引之乎近爾。引之乎近者何也。公穀近乎文定。左氏近乎公穀。孔子近乎左氏也。此我伯父忠憲公有周易孔義之書。不已而有春秋孔義之書也。伯父生平性廉節介。疾惡如仇。然宅衷寬易。不為深礮。可喜之論。故權衡四傳。悉稟丘山。凡經無傳有者。不敢信也。經有傳無者。不敢疑。



也。其文簡。其意覈。有嚴正之義。  
焉。有忠恕之仁焉。有闢疑之春。  
焉。如書。牧不書督。曰削之也。賊  
也。晉。止不序。曰不信。不敢加尊  
也。戚之圍也。曰先夏國兵。父不  
子。不可訓也。桃園之甲。曰盾也。  
非穿也。何嚴正以斷乎。如謀弑。  
逆者歸生也。曷係之公子也。曰  
左氏之記事。或謬也。州蒲之弑。  
傳曰書也。曰非書也。晉也。買之。



弑。歐陽辨三傳曰信也。曰非信也。誤也。何忠恕以施乎。葬我小君文姜曰從夫謚禮也。不栢而文者何也。莒人滅鄆傳曰莒子後鄆也。滅鄆者鄆以莒非莒也。

曰莒人滅鄆者何也。尹氏卿也。伯父不可也。曰伯也。或字非爵也。由狩獲麟。或曰感麟而作也。或曰因麟而發也。或曰文成麟見也。曰感之始成。或可也。感之



始作或不可也。何慎疑而不証  
乎。且伯父之守正罔撓。居敬勿  
欺。所謂君子之指春秋沒身而  
已。其訓人也。以身也。言也乎哉。  
仍頽以孔義者何也。欲誦法孔  
子者。不失為聖人之徒也。世泰  
久悼遺音。已邈揚厲。未能而  
儼海秦先生。倡明辨絕。嘉弁來  
茲。懇經教之漸淪。志末學之放  
失。既捐貲板周易孔義。復續板



春秋孔義伯父有志得先生而  
言益章。語曰流水揚于峻渠善  
言揚於義士先生之謂欤。自兩  
義明而六經之義無不明。若先  
生者。功表前人。惠專後學。豈私  
我伯父哉。如泰之感而欲涕也。  
固私也。

崇禎庚辰春仲高世泰題於長  
安執虛堂



春秋左傳卷一



春秋孔義卷一

梁溪高攀龍著

後學秦樹勳

男世儒



世學

世學秦訂

隱公

元年

元年者正始也

春王正月



春周時之春也稱王正月大一統也夏時之十一月也不書卽位攝也

三月公及邾儀父盟于蔑

我所欲曰及公攝位而欲求好于邾也儀父邾君之字也邾魯之附庸中國之附庸例稱字

夏五月鄭伯克段于鄆

稱鄭伯歸罪也克者力勝之詞不稱弟段不弟也于鄆遠也段出奔其不書鄭伯志殺段也

秋七月天王使宰咺來歸惠公仲子之賵

王者奉若天道故稱天王其命曰天命其討曰天討盡此道者王道也仲子繫惠公而言謂惠公之仲子妾稱也車馬曰賵貨財曰賻衣被曰緦以天王下賵諸侯之妾不天亂倫之甚也名咺以見其不王王臣雖微不名况于宰乎

九月及宋人盟于宿

惠公季年敗宋師于黃公立而求成焉稱及稱人皆非卿也

冬十有二月祭伯來



來來朝也祭伯非王命而私交不與其朝也  
公子益師卒

益師卿也不書官非受命于天子也稱公子以  
公子故使爲卿也不日卒史不備也

二年春公會戎于潛

脩惠公之好故何以書譏也

夏五月莒人入向無駭帥師入極

莒子娶于向向姜不安莒而歸莒人入向以姜

氏還書人微者也入者入而不居也無駭不氏

未賜族也帥師用大衆也入向入極無王也

秋八月庚辰公及戎盟于唐

潛之會猶請盟而辭復與之盟益非義矣

九月紀履緌來逆女冬十月伯姬歸于紀

履緌紀大夫也非命卿皆書名內女嫁爲諸侯

夫人則書逆書歸明重事也先儒謂譏不親逆

非也諸侯親迎迎于所館豈有委宗廟社稷遠

適他國以逆婦者乎

紀子伯莒子盟于密



此必紀侯莒子紀迫于齊而與于莒故相盟天下無主則小國不安而齊人滅紀之端見矣

十有二月乙卯夫人子氏薨

夫人者隱之妻也卒不書葬夫人之義從君者也

鄭人伐衛

段之亂公孫滑出奔衛衛人爲伐鄭取廩延鄭人旣以王師號師伐衛南鄙矣今復擅興師何爲乎

三年春王二月己巳日有食之

日食有常度何以書在人君之敬忽不敬則災

三月庚戌天王崩

天王崩不奔赴不會葬不朝新君隱之罪大矣不書而自見

夏四月辛卯尹氏卒

書尹氏譏世卿也外大夫不卒此何以卒尹氏以王崩爲諸侯主而來赴非禮也

秋武氏子來求賻



書武氏見其世官子者父老而子攝行卿事也  
天王崩諸侯不供喪而來求君不君臣不臣交  
譏之崩薨者臣子之尊稱故外諸侯稱卒以別  
內也

八月庚辰宋公和卒

宋宣公舍其子與夷而立穆公穆公立與夷而  
使公子馮出居鄭殤公忌馮自此宋鄭之爭啓  
矣

冬十有二月齊侯鄭伯盟于石門

齊鄭之交始此

癸未葬宋穆公

諸侯告喪魯往會葬則書穆公私謚也

四年春王二月莒人伐杞取牟婁

諸侯相伐取地於是始取者收奪之名

戊申衛州吁弑其君完

不稱公子身爲大惡絕之於其先君也其又有  
以屬稱者或過其親之以啓亂或見其以親而  
反讐事同詞異各有義而不可例拘也



夏公及宋公遇于清

古有遇禮以待不期之會今相期也而同于不期之簡故書曰遇及者內爲志也

宋公陳侯蔡人衛人伐鄭

宋殤不誅弑君之賊不念穆公舍其子而立已反以馮之在鄭從州吁伐鄭天理滅矣故是役也首謀在衛而以宋主兵

秋翬帥師會宋公陳侯蔡人衛人伐鄭

四國伐鄭圍其東門五日而還至秋宋來乞師復伐公弗許而翬固請以行無君之心兆矣隱公不能辨之於早以及于難書翬帥師惡之也不稱公子所以謹履霜之戒

九月衛人殺州吁于濮

程子曰稱衛人衆詞也舉國殺之也

冬十有二月衛人立晉

未有爲子而不受之父也未有爲諸侯而不受之王也內不承國于先君故不稱公子上不稟命于天子故稱衛人立



五年春公觀魚于棠

臧僖伯諫而不聽僖伯稱疾不從

夏四月葬衛桓公

討賊而始葬魯往會故書

秋衛師入郕

將卑師衆稱師衛晉乘亂得立而遽興戎毒衆

失君道矣

九月考仲子之宮

考始成而祀也凡宮廟非志災失禮則不書

初獻六羽

書初獻見前此借用八矣

邾人鄭人伐宋

宋取邾田邾人請于鄭故鄭會邾伐宋先邾人

爲主也

螟

國之大事故書

冬十有二月辛巳公子彊卒

臧僖伯也



宋人伐鄭圍長葛

書圍志暴也

六年春鄭人來輸平

公之未立與鄭人戰于狐壤止焉故與宋為黨

士修怨于鄭邾鄭伐宋入其郛宋來告命使者失

詞欲救而止鄭人遂乘隙而輸平也和而不盟

曰平

夏五月辛酉公會齊侯盟于艾

始平于齊也

秋七月

程子曰無事書首月天時王月備而後成歲也

冬宋人取長葛

圍其邑周一歲而取之

七年春王三月叔姬歸于紀

按伯姬為紀侯夫人其姊叔姬為媵待年于宗

國不與嫡同行至是始歸于紀其後桓十二年

紀滅宗廟在鄫叔姬不歸宗國而歸於鄫以全

婦道春秋賢之故書此以張本程子曰姊歸不



書閱其無終也

滕侯卒

程子曰不名史闕文也

夏城中丘

凡用民必書勞民爲重事也

齊侯使其弟年來聘

程子曰凡不稱公子而稱弟者或責其失兄弟之義或罪其以弟之愛而寵任之過先儒母弟之說蓋緣禮文有立嫡子同母弟之說其曰同母弟蓋謂嫡耳非以同母爲加親也若以同母爲加親是不知人理近于禽道也

秋公伐邾

爲宋討也渝蔑之盟矣

冬天王使凡伯來聘戎伐凡伯于楚丘以歸

周禮時聘以結諸侯之好諸侯不修臣職而聘之非王體也國曰伐此一人而曰伐大天子之命也楚丘衛地以歸易詞于楚丘者罪衛之不救以歸者罪凡伯之失節



八年春宋公衛侯遇于垂

齊將爲鄭平宋衛有會期矣而宋衛先爲垂之遇者有私謀也私謀爲何有意於從齊黨而無志於釋鄭憾也

三月鄭伯使宛來歸祊庚寅我入祊

魯有朝宿之邑在王畿之內曰許鄭有湯沐之邑於泰山之旁曰祊時天子不巡守魯亦不朝故欲以祊易許田各取其近者前此來輸平以言請之矣至是始入地也入者內不受也義不可而強入之也

夏六月己亥蔡侯考父卒

辛亥宿男卒

秋七月庚午宋公齊侯衛侯盟于瓦屋

宋衛一黨也齊鄭一黨也鄭莊挾齊以自強齊僖特假鄭以糾合耳不逾年會防謀伐宋矣要盟何益哉

八月葬蔡宣公

諸侯五月而葬宣公卒兩月耳不及期簡也



九月辛卯公及莒人盟于浮來

浮來莒地人微者莒雖小國而入向伐杞能爲魯患故七年城中丘以備之至是復屈已要盟于其地魯之不國甚矣

螟

冬十有二月無駭卒

書名未賜族也季氏曰未爲卿也

九年春天王使南季來聘

諸侯不朝而聘之不王也

三月癸酉大雨震電庚辰大雨雪

陰陽運動有常而無忒凡失其度人爲感之也

挾交

夏城郎

郎逼宋城郎將爲鄭伐宋也

秋七月

冬公會齊侯于防

會防謀伐宋也左氏曰鄭伯以王命討宋之不王豈其然乎假此以誑齊魯耳



十年春王二月公會齊侯鄭伯于中丘  
會於中丘盟于鄆爲師期也

夏翬帥師會齊人鄭人伐宋

三國先遣將致伐齊鄭稱人非卿也

六月壬戌公敗宋師于菅

不言戰而言敗敗者爲主彼與戰而此敗之也  
辛未取郟辛巳取防

程子曰取二邑而有之盜也

秋宋人衛人入鄭宋人蔡人衛人伐戴鄭伯伐取  
之

宋又連衛以報鄭鄭幸菅之敗而不備故師還  
及郊宋衛已乘其虛而入之矣

左氏曰宋衛旣入鄭而以伐戴召蔡人蔡人怒  
故不和而敗戴鄭所與也故伐之鄭伺三國之  
便與戴合攻故取三師也

冬十月壬午齊人鄭人入郕

衛蔡郕與國也故不會伐宋鄭旣得衛蔡故又  
入郕



十有一年春滕侯薛侯來朝

諸侯雖有相朝之禮而當時諸侯皆不朝王獨朝魯可乎滕薛二君不特言者譏旅見也

夏公會鄭伯于時來

時來鄭地謀伐許也

秋七月壬午公及齊侯鄭伯入許

鄭隣許伐許鄭志也書及內爲主也以歸昉之故也

冬十有一月壬辰公薨

薨不書地弑也孰弑暈也孰使暈弑桓也賊不討不書葬無臣子也



春秋孔義卷二

桓公

元年春王正月公即位

繼故不言卽位先君不以其道終子弟不忍卽位也繼故而言卽位則弒也故美惡不嫌同辭

三月公會鄭伯于垂

鄭爲主故稱會

鄭伯以璧假許田

朝宿之地先王所錫先祖所受而私相貿易是



無君無親也曰假諱易地也

夏四月丁未公及鄭伯盟于越

魯志也故稱及桓公欲結鄭好以自安故既與許田又爲盟也弑君之人凡民罔不懟而鄭與之盟以定之其罪大矣

秋大水

桓行逆德而致陰沴宜矣

冬十月

二年春王正月戊申宋督弑其君與夷及其大夫孔父

程子曰人臣死君難書及以著其節父名也稱大夫不失其官也

左氏曰宋督攻孔氏殺孔父而取其妻公怒督懼遂弑殤公孔父先死曰及何也穀梁曰書尊及卑春秋之義也孔父之先死何也公羊曰孔父正色立朝使其生而存君不可得而弑也孔父可謂義形于色矣

滕子來朝



杞最小初稱侯已稱伯稱子滕亦小初書侯已書子蓋弗給于朝覲貢賦自降爲子聖人因其實而書之桓公天下之大惡滕子先隣國而朝其罪自見也

三月公會齊侯陳侯鄭伯于稷以成宋亂

爲賂故立華氏也會未有指言所事指言所事特書也此春秋大義也

夏四月取郟大鼎于宋戊申納于太廟

取者得非其有之稱宋始以不義取之故係其器于郟賂公者宋也而書曰取蔽罪于魯也以成亂之賂器置周公之廟公其受之乎故書納納者弗受而強致之也

秋七月杞侯來朝

杞當作紀杞則非侯也來朝懼齊也

蔡侯鄭伯會于鄧

左氏曰始懼楚也春秋著夷狄亂華之始

九月入杞

左氏曰討不敬也豈其然乎紀求魯庇魯因責



利小國不能供焉耳

公及戎盟于唐

冬公至自唐

出告反至常事爾何以書或以去國踰時之久或以會盟侵伐之危或以黨惡附姦之罪唐之至危之也弑君之賊使戎而不如鄭齊陳之黨惡則討之矣

三年春正月

闕疑

公會齊侯于贏

左氏曰成昏于齊也杜氏曰不繇媒介非禮也夏齊侯衛侯胥命于蒲

古者不盟結言而退胥命相命也相命近正也故荀卿曰春秋善胥命

六月公會杞侯于郕

杞求成也

秋七月壬辰朔日有食之既

汪氏曰日食三十六食既者三皆臣子僭逆夷



狄暴橫之應故此年而後荆楚僭王鄭敗王師  
宣八年而後楚莊圍宋伐鄭伐晉襄二十四年  
而後齊崔杼衛甯喜弒君吳楚橫行中國

公子翬如齊逆女

稱公子已爲卿也

九月齊侯送姜氏于謹

越竟送女非禮也

公會齊侯于謹

爲齊侯爾非爲親迎也

夫人姜氏至自齊

告廟而飲至也以翬往而不言以至者公親受

之齊侯也皆非禮也

冬齊侯使其弟年來聘

致夫人也非禮也

有年

十二公多歷年所豈無豐年而獨桓書有年宣  
書大有年何也桓弒君而立宣爲弒君者所立  
皆獲罪于天宜得水旱凶災而乃有年是反常



也故紀其異

四年春正月公狩于郎

于郎遠也

夏天王使宰渠伯糾來聘

程子曰桓弑君而立天子不能治天下莫能討  
而王使其宰聘之天理滅矣人道亡矣

或曰渠氏伯糾字以大夫而攝宰者

是年不具秋冬未詳

五年春正月甲戌巳丑陳侯鮑卒

杜元凱長歷正月無甲戌

夏齊侯鄭伯如紀

齊鄭朝紀欲以襲之紀人知之外相如不書此  
何以書紀來告也以諸侯而爲賊于隣國春秋  
所深疾也

天王使仍叔之子來聘

書仍叔之子譏世官也

葬陳桓公

城祝丘



祝丘在齊魯之間公欲助紀而畏齊故以非時  
城

秋蔡人衛人陳人從王伐鄭

王奪鄭伯政鄭伯不朝王以諸侯伐之戰于緡  
葛王卒大敗鄭師射王中肩不書戰不書敗所  
不忍言存天下之防也書從王明君臣之義也  
然則曷爲書王師敗績于茅戎曰王師則非親  
討敗而可書也

大雩

大雩帝用盛樂天子之事也魯諸侯而郊禘大  
雩歲以爲常不能悉書故雩以非時而書非時  
而雩以旱也書之見其非禮且志旱也郊禘亦  
因事而書

各

各書時不在一月也

冬州公如曹

州公嘗爲王三公故稱公傳云度其國危遂不  
復



六年春正月寔來

寔州公也程子曰不能反國故遂名之忽稱鄭忽明其正也寔不稱州亡其國也

夏四月公會紀侯于郕

諮謀齊難也

秋八月壬午大閱

簡車馬也懼齊鄭故先王寓軍政于四時之田其備豫矣無事而爲之妄動也有警而爲之教之不素也盛夏大閱厲農失政甚矣不言公一國之事也

蔡人殺陳佗

佗弑太子免而自立踰年矣書曰陳佗以賊討也蔡侯殺之而書蔡人天下之大惡人皆得而誅也

九月丁卯子同生

啖氏曰君嫡子生以太子生之禮舉之則史書之

冬紀侯來朝



欲公請王命求齊成公告不能

七年春二月己亥焚咸丘

咸丘地名焚林而田淫獵也

夏穀伯綏來朝邳侯吾離來朝

名之者賤之也越國踰境相繼而朝弑君之賊  
爲可賤也

八年春正月己卯烝

冬烝非過也書之譏五月復烝爲黷也

天王使冢父來聘

桓公弑立未嘗朝覲天王不討至是三聘矣

夏五月丁丑烝

黷祀也志不敬也

秋伐邾

冬十月雨雪

程子曰建酉之月未霜而雪書異也

祭公來遂逆王后于紀

左氏曰禮也杜氏曰天子娶于諸侯使同姓諸  
侯爲之主祭公來受命于魯故曰禮也程子曰



王姬下嫁則同姓諸侯爲之主逆王后無使諸侯爲主之理此譏祭公受命逆后而過魯行朝會之禮若以朝魯爲主而逆后爲遂也胡氏取劉敞之說曰命魯以婚姻之事大夫可矣何必三公任重而輕使故祭公專命不報遂行如紀王以輕使爲失祭公以遂行爲罪矣趙鵬飛曰齊將滅紀紀託于魯魯不能庇於是爲之謀俾納女子于王託王爲重焉祭公因不反命而遂逆王后也

九年春紀季姜歸于京師

逆稱王后主王朝言也歸稱季姜主紀言也京大師衆也凡王后非過國都不書歸

夏四月

秋七月

冬曹伯使其世子射姑來朝

曹伯有疾使其世子來朝君疾而儲副出危道也

十年春王正月



庚申曹伯終生卒

夏五月葬曹桓公

秋公會衛侯于桃丘弗遇

會者期詞弗者遷詞衛侯失信也衛中變而從齊鄭于是乎有郎之師桃丘衛地

冬十有二月丙午齊侯衛侯鄭伯來戰于郎

內不言戰言戰則敗也不書及爲內諱也鄭主兵而首齊猶州吁主兵而首宋非齊宋則不能舉也

十有一年春正月齊人衛人鄭人盟于惡曹

此郎之諸侯也人之示貶也

夏五月癸未鄭伯寤生卒

鄭莊一時之雄也射王陷弟害隣謀立宋莊身沒未幾而世嫡出奔庶孽奪正國內大亂爲宋莊反噬爲不善者可鑒矣

秋七月葬鄭莊公

九月宋人執鄭祭仲

宋人宋公也其曰人貶也祭畿內邑仲字也以



天子命大夫爲鄭相也死君難臣道也祭仲被  
執而廢紕其君立非所當立其罪大矣字之者  
非賢之也尊王命貴正卿著其罪而深責之也  
公羊以祭仲廢君爲權害義傷教不可從  
突歸于鄭

突不稱公子不可以有國也曰歸易詞也以祭  
仲易惡祭仲也

鄭忽出奔衛

忽世子也以國氏正也其名失國也

柔會宋公陳侯蔡叔盟于折

柔魯大夫未賜族蔡叔諸侯之兄弟稱字內大  
夫會外諸侯盟始此折魯地

公會宋公于夫鍾

冬十有二月公會宋公于闕

十有二年春正月

夏六月壬寅公會杞侯莒子盟于曲池

隱二年紀莒盟于密隱四年莒人伐紀是時紀  
謀齊難故爲盟莒以援之曲池魯地



秋七月丁亥公會宋公燕人盟于穀丘

燕南燕姑姓伯爵黃帝之後穀丘宋地

八月壬辰陳侯躍卒

公會宋公于虛

虛宋地

冬十有一月公會宋公于龜

龜宋地

丙戌公會鄭伯盟于武父

宋莊責賂而有怨于鄭魯桓憾忽而欲平突于宋至于君臣六會而宋不許平其辱甚矣于是遂有武父之盟武父鄭地

丙戌衛侯晉卒

十有二月及鄭師伐宋丁未戰于宋

屢盟而卒叛數會而卒離故盟會春秋所惡也來戰者罪在彼戰于郎是也往戰者罪在內戰于宋是也

十有三年春二月公會紀侯鄭伯已巳及齊侯宋公衛侯燕人戰齊師宋師衛師燕師敗績



左氏以爲鄭與宋戰公羊以宋與魯戰穀梁以紀與齊戰趙匡據經文內兵主紀而先于鄭外兵主齊而先于宋獨取穀梁之說蓋齊合宋衛燕三國伐紀魯則紀其自出求兵于鄭往救之戰于紀而勝之也胡氏曰紀之不能保其國自此戰始矣

三月葬衛宣公

既與衛人戰曷爲葬宣公怨不棄義怒不廢禮且衛助齊魯援紀非敵怨也禮喪在殯孤無外事衛宣未葬朔乃卽戎又不稱子從吉行事據事直書而惡自見也

夏大水

秋七月

冬十月

十有四年春正月公會鄭伯于曹

曹在衛南而東北爲齊界所以伺齊衛之往來虞其報救紀之怨也

無冰



時燠也政事舒緩紀綱縱弛之象

夏五

傳疑也

鄭伯使其弟語來盟

凡外大夫請盟于魯曰來盟內大夫請盟于彼曰涖盟使來盟盟前定也

秋八月壬申御廩災

粢盛所藏也

乙亥嘗

穀梁曰志不敬也壬申御廩災乙亥嘗以爲未易災之餘而嘗也胡氏曰不時也秋嘗以物成而薦新爲義夏之六月未可嘗也

冬十有二月丁巳齊侯祿父卒

宋人以齊人蔡人衛人陳人伐鄭

師而曰以者能左右之以行其意也以一國而用諸侯之師於是始以者爲所以者其罪一也十有五年春二月天王使家父來求車

諸侯不貢車服天子不私求財王之不王甚矣



三月乙未天王崩

是後莊王僖王不書崩見王室不告魯不赴而諸侯不臣益甚矣

夏四月己巳葬齊僖公

五月鄭伯突出奔蔡

按左氏祭仲專鄭伯患之使其壻雍糾殺之雍姬知之以告仲仲殺雍糾公出奔蔡是祭仲逐之也而不書何也陸淳曰凡諸侯之奔皆不書所逐之臣聖人端本清源明其自取焉耳程子曰避祭仲而出非國人出之也

鄭世子忽復歸于鄭

忽嘗嗣位君國歸而稱世子則亡其君位明矣稱復歸反正也

許叔入于許

隱十一年魯及齊鄭入許許莊公奔衛鄭使莊公之弟許叔居許東偏以奉其祭祀鄭亂故許叔入許曰入者難詞因亂竊入非復國之義故書入



公會齊侯于艾

左氏曰謀定許也

邾人牟人葛人來朝

朝非微者之禮曷爲書人天王崩而相與旅見弑逆之人故人以賤之公羊曰夷狄之是也

秋九月鄭伯突入于櫟

櫟鄭大都也入于櫟則入于鄭矣書入義不容也程子曰突非正也而忽不能君故國人君突諸侯助之春秋書爵所以戒居正者已不能保則人取之矣

冬十有一月公會宋公衛侯陳侯于袤伐鄭

左氏曰將納厲公也弗克而還先地而後伐先疑而後決也穀梁曰非其疑也非其疑于爲義而果于爲不義也袤宋地宋鄭仇也何以主兵蓋忽雖正其才不足以君一國突雖篡其智足以結四隣宋之相戾而復相用者賄耳

十有六年春正月公會宋公蔡侯衛侯于曹

夏四月公會宋公衛侯陳侯蔡侯伐鄭



程子曰突善結諸侯也齊氏曰自入春秋蔡常先衛自是遂序衛之下先儒以爲後至實則以勢之強弱相上下而不復用周班矣

秋七月公至自伐鄭

凡書至者久之也危之也 去年十一月會伐今年正月又會四月又伐故書至

冬城向

言冬通後月之詞也

十有一月衛侯朔出奔齊

按左氏以殺急子聲子也公穀以得罪天子也

十有七年春正月丙辰公會齊侯紀侯盟于黃

左氏曰平齊紀且謀衛也黃衛地

二月丙午公會邾儀父盟于雒

下書伐邾則惡自見矣

夏五月丙午及齊師戰于奚

齊人侵魯疆書戰敗也奚魯地吳氏曰盟未幾而齊來侵境平紀之信豈可恃乎

六月丁丑蔡侯封人卒



春秋左傳卷二十一  
秋八月蔡季自陳歸于蔡

何休曰蔡桓侯無子季次當立桓侯欲立獻舞而疾季季避之陳桓侯卒蔡人召季于陳而季歸歸順詞既歸何以不有國獻舞立矣劉敞曰智足以與權而不亂力足以得國而不居遠而不携邇而不迫是以見貴于春秋

癸巳葬蔡桓侯

葬未有不稱公者稱其本爵或曰請謚于土者也或曰傳失之

及宋人衛人伐邾

邾宋爭疆魯從宋志春盟而秋背之瀆信不仁甚矣

冬十月朔日有食之

左氏曰不書日官失之也

十有八年春王正月公會齊侯于濼公與夫人姜氏遂如齊

穀梁曰濼之會不言及夫人以夫人之伉也以尊及卑曰及以此及彼曰及皆及者爲主夫人



驕伉公不能制也故曰與與則匹敵而無彼此  
尊卑之別也罪公也治其本也濼齊地

夏四月丙子公薨于齊丁酉公之喪至自齊

聖人直書義在其中濼之會不書夫人出以遂  
如齊見之喪至不書夫人入以孫于齊見之其  
事著矣

秋七月

冬十有二月己丑葬我君桓公

賊未討何以書葬公羊曰讐在外也穀梁曰不  
責踰國而討于是也胡氏曰隱公之讐在內在  
內者討于是春秋于桓公書葬隱然足以快魯  
國臣子之心哉



春秋孔義卷三

莊公

元年春王正月

繼弒不書卽位先君不以其道終子不忍卽位也故莊僖閔皆不書

三月夫人孫于齊

不稱姜氏魯之臣子絕不爲親也內諱奔故云孫猶言孫讓而去也見其無所容而絕之也至矣



夏單伯逆王姬

單伯吾大夫之命乎天子者也逆王姬使我爲之主也天子嫁女于諸侯必使諸侯同姓者主之諸侯嫁女于大夫必使大夫同姓者主之不自爲主者行婚姻之禮則傷君臣之義行君臣之禮則廢婚姻之好故使同姓敵體者主之也然諸侯當躬至京師天子置館命同姓之尊者行賓主之禮然後逆歸本國此男下女之義也齊侯旣不朝王又不親迎而魯之單伯反往逆之莊王不念齊魯之讐而命之主婚魯不念君父之讐而爲之往逆忘親釋怨人道絕矣

秋築王姬之館于外

主王姬者必自公門出於廟則已尊於寢則已卑爲之築節矣築必有常處何以築於外仇讐之人非所以接婚姻也衰麻非所以接弁冕也知其不可故築于外也然有三年之喪天王於義不當使之主有不戴天之讐莊公于義不可爲之主築於外之爲宜不若辭而不主之爲正



也

十月乙亥陳侯林卒

王使祭叔來錫桓公命

不稱天寵篡弑以瀆三綱也

王姬歸于齊

書歸于齊而後忘親之罪著矣

齊師遷紀邾鄆郚

紀三邑也徙其民取其地曰遷紀之滅始于此矣

二年春王二月葬陳莊公

夏公子慶父帥師伐於餘丘

慶父公之庶兄也公子已爲卿也於餘丘邾邑也邑未有書伐者志慶父之主兵也其後卒致子般之禍亂之所由來矣

秋七月齊王姬卒

外夫人不卒此何以卒檀弓曰齊告王姬之喪魯莊公爲之大功忘親媚讐其罪大矣

冬十有二月夫人姜氏會齊侯于禚



姜氏齊侯之惡著矣莊公可以爲子乎襍齊地  
乙酉宋公馮卒

三年春王正月溺會齊師伐衛

此公子溺也未賜族伐衛者朔在齊欲納之也  
忘讐罪大矣况合黨以伐同姓乎

左氏曰衛朔出奔二公子立黔牟何休據世本  
史記以朔出奔王立公子留

夏四月葬宋莊公

五月葬桓王

左氏曰緩也王崩至是七年矣公羊曰改葬也  
秋紀季以鄆入于齊

紀季紀侯之弟也齊欲滅紀故季以邑入齊爲  
附庸存先祀也紀侯之命也故不書奔不書名  
入者難詞罪齊而閔季也

冬公次于滑

將會鄭伯謀紀鄭伯辭以難凡師一宿爲舍再  
宿爲信過信爲次次止也春秋紀兵伐而書次  
以次爲善救而書次以次爲譏次于滑譏也欲



救紀而不能也滑鄭地

四年春王二月夫人姜氏享齊侯于祝丘

禮姑姊妹已嫁而反兄弟不與同席而坐况用兩君相見之禮乎祝丘魯地

三月紀伯姬卒

外夫人不卒此其卒吾女也

夏齊侯陳侯鄭伯遇于垂

張氏曰謀取紀也胡氏曰鄭伯厲公非子儀也然是時厲公尚在櫟豈能出會十四年使傅瑕弑子儀始入鄭耳此當是子儀

紀侯大去其國

程子曰大名責在紀也齊師未加而去也胡氏曰大去者土地人物儀章器物悉委置之而不顧也張氏曰春秋凡關紀之存亡者一一備書紀侯圖存不獲委宗廟于其弟而去之故不書奔而曰大去不書名而曰紀罪齊而閔紀也

六月乙丑齊侯葬紀伯姬

不書齊滅紀至是而齊侯滅紀之罪著矣孫明



復曰甚齊侯之詐也

秋七月

冬公及齊人狩于禚

與讐狩人理絕矣齊侯也而人之所不忍言也

五年春王正月

夏夫人姜氏如齊師

會矣而享享矣而如齊師人之爲不善一縱之

後如水方至莫知所極也夫前此歷日而返故

書月至此歷月而返書時矣

秋邠黎來朝

邠國黎來名其後王命爲小邠子春秋繁露曰

附庸字者方三千里名者方二十里

冬公會齊人宋人陳人蔡人伐衛

穀梁子曰是齊侯宋公也曰人何也人諸侯人

公也人公何也逆王命也

六年春王正月王人子突救衛

程子曰王人微者例不書字子突救衛而字之

善之也善子突則善王命也穀梁曰善救者則



伐者不正矣

夏六月衛侯朔入于衛

秋公至自伐衛

入有二義難詞也逆詞也歸君未有不復不言復不言復者未得國也朔得國矣而書入何逆王命也衛朔書名書入以著其惡王人書字書救以著其善外則諸侯書人內則莊公書至而春秋之情見矣

螟

冬齊人來歸衛俘

俘軍所獲也公羊曰衛寶也朔奔齊齊連諸侯納朔蓋朔以寶賂齊而齊以分于三國也春秋書此結正諸侯之罪也

七年春夫人姜氏會齊侯于防

防魯地左氏曰齊志也

夏四月辛卯夜恒星不見夜中星隕如雨

恒星常見之星如雨隕者衆也王運將終伯統方作堯舜禹湯文武之紀綱掃滅殆盡矣



秋大水無麥苗

苗禾也麥熟大水故與苗俱無也

冬夫人姜氏會齊侯于穀

穀齊地蓋一歲而再會矣

八年春王正月師次于郎以俟陳人蔡人

師即圍郕之師必齊意也

甲午治兵

兵即郎之兵俟而不至申治之耳

夏師及齊師圍郕郕降于齊師

張氏曰書魯用師未有如是之詳者次郎可謂

無名治兵可謂黷武圍郕而郕降齊可謂無功

歷三時而師還可謂害民逆天道親仇讐伐同

姓勦民力備書而惡著矣

秋師還

冬十有一月癸未齊無知弑其君諸兒

僖公之母弟曰夷中年生公孫無知有寵于僖

公衣服禮秩如適此亂本也不書公孫罪僖公

也



九年春齊人殺無知

殺無知者雍廩而曰齊人者討賊也

公及齊大夫盟于莒

此魯莊報讐之會忘親而圖其後嗣故以及譏  
莒齊地也

夏公伐齊納糾齊小白入于齊

左傳書納子糾公穀書納糾杜氏注子糾小白  
皆僖公庶子而糾長荀卿亦謂桓公殺兄以爭  
國獨史記載薄昭諫淮南厲王有曰齊桓殺其  
弟以反國程子取此以證子糾之爲弟未知誰  
是今以公穀爲據糾不書子小白繫齊又參以  
夫子荅子路子貢之言不責管仲之忘君事讐  
則其長幼是非見矣

秋七月丁酉葬齊襄公

八月庚申及齊師戰于乾時我師敗績

公敗也不言公者見乎伐齊納糾之文矣

九月齊人取子糾殺之

此書子糾不當殺也



冬浚洙

洙在魯北齊伐魯之道也浚洙爲齊備也

十年春王正月公敗齊師于長勺

詐戰曰敗敗之者爲主以責魯也善爲國者不師善師者不陣善陣者不戰至於戰讐怨相尋亂亡之道也况以詐乎長勺魯地

二月公侵宋

是時魯與齊讐必陰結于宋故魯乘長勺之勝而侵之深其怨于齊又衆其敵于宋春秋所惡也

三月宋人遷宿

宿介宋魯間宋人以爲貳于魯而遷之蓋移之封內以爲附庸自是宿不復見則亦亡矣所謂不再貶而惡見者也

夏六月齊師宋師次于郎公敗宋師于乘丘

外師不書伐內不書戰胡氏曰次者不以其事勝者不以其理交譏之也

秋九月荆敗蔡師于莘以蔡侯獻舞歸



于是荆始猾夏矣蔡侯何以名絕之也爲其服  
爲臣虜也荆州名楚始封以爲國至成王頹改  
稱楚李濂曰執君滅國皆始此年天下無王齊  
爲之天下無中國楚爲之也

冬十月齊師滅譚譚子奔莒

書奔責不死位也不書出國亡無所出也猶書  
爵強暴所加非其罪也

十有一年春王正月

夏五月戊寅公敗宋師于鄆

左氏曰凡師敵未陣曰敗某師皆陣曰戰大崩  
曰敗績得雋曰克覆而敗之曰取其師京師敗  
曰王師敗績于某鄙魯地宋師再敗而禍及魯  
師再勝而國困矣

秋宋大水

胡氏曰外災告則書杜氏曰公使吊之故書張  
氏曰比歲交兵怨不廢禮古意之猶存也

冬王姬歸于齊

何以書過我也何以與侯女同辭王姬雖貴其



當執婦道與公侯庶人之女無以異也

十有二年春王三月紀叔姬歸于鄴

叔姬隱七年歸紀伯姬既卒叔姬實攝內事從紀侯去國至是紀侯卒而始歸鄴宗廟在焉義當歸也

夏四月

秋八月甲午宋萬弑其君捷及其大夫仇牧

萬宋之有力人也乘丘之戰被獲于魯歸乃以爲大夫而又斬之又與之博則閔公之弑其自取也仇牧與大宰督同死而督不書則弑君之賊也

冬十月宋萬出奔陳

汪氏曰春秋書逆賊出奔一以責國人之失賊一以責鄰國之受賊也

十有三年春齊侯宋人陳人蔡人邾人會于北杏何以會平宋亂也以諸侯主天下會盟之政自北杏始春秋非主兵皆序爵於是齊序宋公之上四國稱人而獨爵齊主盟北杏齊地



夏六月齊人滅遂

北杏之會遂人不至而遽滅之則甚矣凡書滅者不待再貶而惡已見稱人將卑師少也自此至閔二年遷陽凡齊兵皆稱人見其兵精而不貴多也

秋七月

冬公會齊侯盟于柯

始及齊平也柯齊阿邑會于齊則齊侯意也

十有四年春齊人陳人曹人伐宋

背北杏之會故也程子曰齊自管仲爲政莊十一年而後未嘗興大衆也終仲之身四十年息養天下厚矣惟救邢稱師譏其次也

夏單伯會伐宋

陳曹魯皆與宋鄰單伯魯大夫也舉三國之師亦見其不勞遠人矣

秋七月荆入蔡

蔡人與北杏之會矣而齊不能救力未及也自是蔡人不復與齊會盟



冬單伯會齊侯宋公衛侯鄭伯于鄆

宋服故也鄆衛地衛朔入國不通諸侯者九年鄭突自遇垂不通諸侯者十一年今不敢不至矣

十有五年春齊侯宋公陳侯衛侯鄭伯會于鄆踰年再會諸侯之心猶未一也三合諸侯矣而不盟以示慎重是以盟而莫敢渝也

夏夫人姜氏如齊

莊不與鄆之會故如齊解之自後不復如齊知不禮于桓也

秋宋人齊人邾人伐郕

郕卽小邾齊桓助宋爭郕以脅魯也至僖公時魯旣親齊則進郕爲小邾仍使服魯矣

李氏曰齊伯資宋而成此於宋示驩虞之恩于魯用脅制之術也

鄭人侵宋

間諸侯伐郕而侵宋也背二鄆之會鄭之反覆子齊楚之間蓋始于此胡氏曰聲罪致討曰伐



潛師掠境曰侵汪氏曰侵伐皆行師之名雖夷狄亦書伐伯者之兵亦書侵義之是非係其事之得失不以是爲褒貶也

冬十月

十有六年春王正月

夏宋人齊人衛人伐鄭

中國諸侯宋爲大旣爲之服鄭又爲之報鄭自是宋齊親而中國諸侯定矣

秋荆伐鄭

齊方圖伯楚亦浸強而鄭當其衝中國得鄭可以拒楚楚得鄭可以窺中國自是鄭爲齊楚必爭之地矣

冬十有二月會齊侯宋公陳侯衛侯鄭伯許男滑伯滕子同盟于幽

趙氏曰言會魯會之不書其人微者也同盟者同欲也幽宋地見雖諸侯同欲而宋桓實鼓舞之故齊桓之伯賴宋爲多自後滑滕諸小國不與齊盟者桓公事從簡便使附於大國也伯政



下衰盟會數而賦役煩大國容有不至而小弱莫不奔命焉得失可知矣

邾子克卒

子瑣嗣立或曰卽儀父或曰儀父之子

十有七年春齊人執鄭詹

鄭不朝也諸侯不服不能脩德以來之而執其大夫則小國之從齊皆出于力不贍而非有心悅誠服之意爲可見矣

夏齊人殲于遂

齊人滅遂使人戍之遂之餘民飲戍者酒而殺之齊人殲焉不言遂人殲齊戍而書其自殲所以伸遂人復讐之志而著桓公不仁至自殲其衆也

秋鄭詹自齊逃來

逃義曰逃罪詹也而魯受之又罪魯也

冬多麋

京房曰廢正作淫爲火不明則國多麋劉向五行志曰麋牝獸之淫莊公將娶齊淫女其象先



見如此

十有八年春王三月日有食之

夏公追戎于濟西

不言侵伐者遯退也先王之法敵知畏而遁斯止矣不追也

秋有蜚

此魯所無也故以有書蜚麋皆陰物是時莊公上不能閑其母下不能正其身陽淑消而陰慝長矣此惡氣之應也

冬十月

十有九年春王正月

夏四月

秋公子結媵陳人之婦于鄆遂及齊侯宋公盟鄆之巨室嫁女于陳人結以其庶女媵之因與齊宋盟媵禮之輕也盟國之重也以輕事遂重事惡之也遂專事之詞也

夫人姜氏如莒

杜氏曰非父母國而往書姦



冬齊人宋人陳人伐我西鄙

責魯不恭其事也

二十年春王二月夫人姜氏如莒

夏齊大災

天火曰災齊人來告而魯往吊故書

秋七月

冬齊人伐我

家氏曰是時周有子頹之亂齊桓若罔聞知去年伐魯今年伐我大率逐利以自私耳

二十有一年春王正月

夏五月辛酉鄭伯突卒

張氏曰篡弑竊國之人而春秋始終君之且復記其卒于位所以著亂賊得終王法不行爲世之所由亂也

秋七月戊戌夫人姜氏薨

黃震氏曰文姜之惡極矣春秋始終以夫人之禮書之實書其事而善惡自見耳

冬十有二月葬鄭厲公



王氏曰鄭伯有納惠王之功不免謚爲厲者其始以賂而篡立中以虐而出奔周室雖衰公議尚在臣子私謚不敢妄加美名古意猶可攷也二十有二年春王正月肆大雩

肆放也雩過誤也季氏曰莊公制于文姜魯之羣臣皆不協焉則凡國內臣民以拂意而陷于大罪者多矣故書肆大雩于文姜薨葬之間善莊公之能補過也

癸丑葬我小君文姜

婦人法無謚生以夫國冠之韓姞秦姬是也死以夫謚冠之莊姜定姒是也乃別爲之謚曰文而不繫于桓可乎

陳人殺其公子御寇

胡氏曰國亂無政衆人擅殺而不出於其君則稱人也

夏五月

秋七月丙申及齊高傒盟于防

議婚也不言公諱與高傒盟也



冬公如齊納幣

魯可以釋桓公之讎而不可以娶襄公之女娶  
仇女大惡也况喪未畢而又親納幣不待貶絕  
而著矣

二十有三年春公至自齊

忘父讎而娶齊女冒母喪而往納幣歸復飲至  
可謂有人心者乎

祭叔來聘

王臣也而不言使見私交之罪也

夏公如齊觀社

吳氏曰襄二十四年齊社蒐軍實使客觀之蓋  
齊俗每因祭社蒐軍實以夸示威衆而聚人觀  
之莊公託此爲名以如齊也

公至自齊

荆人來聘

說者以爲進之非也聘者天子問諸侯之禮聖  
人豈與其僭聘問之禮耶

公及齊侯遇于穀



及者內爲志

蕭叔朝公

蕭叔宋附庸書朝公公在外也於外非正也

秋丹桓宮楹

天子諸侯黜堊丹楹非禮也

冬十有一月曹伯射姑卒

十有二月甲寅公會齊侯盟于扈

扈齊地遇于穀盟于扈皆要結姻好也

二十有四年春王三月刻桓宮桷

文姜將祔桓公廟故丹楹刻桷而不知陷于非

禮也

葬曹莊公

夏公如齊逆女

諸侯無越境逆女之禮况於讎人之國乎

秋公至自齊

昏義以正始爲先公不與夫人皆至姜氏不從

公而入失其正矣

八月丁丑夫人姜氏入



日入惡入者也以宗廟爲不受也

戊寅大夫宗婦覲用幣

夫人至大夫見于宗廟婦見于內男贊大者玉帛小者禽鳥女贊榛栗棗脩竝覲同贊是亂男女之別矣哀姜通共仲弒嗣君之禍蓋已兆于此與

莊公之婚書事十一志大惡也

大水

冬戎侵曹曹羈出奔陳赤歸于曹

羈者曹莊公嫡子而赤其庶子戎逐羈而歸赤也曹伯已葬猶不稱爵以微弱不能君也

郭公

經闕誤也

二十有五年春陳侯使女叔來聘

女氏叔字不名者天子之命大夫也

夏五月癸丑衛侯朔卒

衛惠背幽之盟爲齊所惡故魯亦不會其葬也

六月辛未朔日有食之鼓用牲于社



救日皆鼓常事也此何以書不鼓于朝而鼓于社又用牲皆非禮也

伯姬歸于杞

莊公女不書逆者蓋以卿逆而其君親受之境上則但舉重書歸而已

秋大水鼓用牲于社于門

陰盛陽微之變極矣周宣王救旱雖曰靡神不舉然必以側身脩行爲本社與國門非所以致水災者自古豈有伐鼓用牲救水災之禮乎

冬公子友如陳

報女叔之聘凡公及內卿往他國皆不言朝聘而曰如存周禮也友莊公母弟是爲成季以桓公之子故後世列爲三桓此內大夫出聘之始亦季友私行之階也

二十有六年春公伐戎

夏公至自伐戎

曹殺其大夫

曹大夫不名殺者非一人也羈出赤歸之際必



有不附于赤者故赤殺之或曰魯伐戎曹大夫之不與赤者預聞其謀故赤殺之以悅戎其無王擅殺之罪大矣

秋公會宋人齊人伐徐

徐爲魯患舊矣春伐戎又伐徐者必戎之黨也冬十有二月癸亥朔日有食之

二十有七年春公會杞伯姬于洮

左氏曰天子非展義不巡守諸侯非民事不舉大夫非君命不越境會於洮參譏之公與杞侯伯姬皆失正也洮魯地

夏六月公會齊侯宋公陳侯鄭伯同盟于幽

陳鄭服也同志而盟非率之也魯宋陳鄭皆至而衛獨不來故明年伐衛

秋公子友如陳葬原仲

原周畿內邑仲氏爲陳大夫季友之舊也葬原仲公子友之私事請於君以行何以書公羊曰公子慶父公子牙公子友皆莊公母弟慶父牙通乎夫人以脅公季子不忍見也故以葬原仲



適陳遂不復歸三十一年公以病召而始歸也  
冬杞伯姬來

禮父母在歲一歸寧常事不書此何以書不當來也春會於洮冬又歸魯故知其不當來也

莒慶來逆叔姬

莒慶莒大夫也叔姬莊公女也何以稱字大夫自逆則稱字爲其君逆則稱女尊卑之別也大夫越境逆女非禮也諸侯嫁女於大夫必使大夫同姓者主之而公自主之非禮也

杞伯來朝

公會齊侯于城濮

王使召伯廖賜齊侯命請伐衛以其立子頹也  
城濮衛地豈齊以魯衛兄弟使魯說之來歸乎  
衛卒不至而後伐之也

二十有八年春王三月甲寅齊人伐衛衛人及齊人戰衛人敗績

戰不言伐而書伐伐不言日而書日被伐不言及而書及敗績不言人而書人皆罪衛也然齊



桓既以王命伐矣復取賂而還何與不曰齊侯而書人未可盡以將卑師少例之也

夏四月丁未邾子瑣卒

秋荆伐鄭公會齊人宋人救鄭

程子曰救鄭制楚之始蓋天下大勢所在

冬築郿

凶年而用民力於所不必爲也

大無麥禾

舉國皆無也王制冢宰制國用必於歲之抄故

大有大無皆書於冬

臧孫辰告糴於齊

是爲文仲公子彊曾孫也公羊曰君子爲國必

有三年之委一年不熟告糴譏也

二十有九年春新延廡

養馬欲其富故馬廡謂之延延長也大無麥禾

故譏新延廡

夏鄭人侵許

秋有蜚



劉向曰蜚色青非中國所有南越盛暑男女同  
川淫風所生爲虫臭惡娶齊淫女之徵應也羅  
氏曰負蟄今謂之蜚盤虫好以清旦集稻上食  
稻花日出則散去又其氣惡能燻稻使不蕃  
冬十有二月紀叔姬卒

紀國雖滅叔姬執節守義故繫之紀而錄其卒  
葬賢而得書也

城諸及防

三十年春王正月

夏師次于成

穀梁以爲欲救鄆杜氏以爲備齊師趙氏以爲  
欲會齊圍鄆聞鄆已降而不行姜氏曰鄆爲紀  
之附庸必不忍于鄆又不敢逆齊而特次于成  
耳

秋七月齊人降鄆

凡服從內附曰降不書鄆降而曰降鄆罪齊人  
之力脅也

八月癸亥葬紀叔姬



九月庚午朔日有食之鼓用牲于社  
冬公及齊侯遇于魯濟

左氏曰謀山戎也以其病燕故也

齊人伐山戎

遇魯濟獻捷皆書齊侯則伐山戎爲齊侯明矣  
人之者譏也

三十有一年春築臺于郎

一歲三築臺直書而義見矣

夏四月薛伯卒

張氏曰薛始稱伯降班而告終也

築臺于薛

六月齊侯來獻戎捷

諸侯不相遺俘獻者下奉上之詞齊侯親來甲  
詞尊魯故據其所稱之實而謂之獻也

秋築臺于秦

秦魯西境地也

冬不雨

程子曰一歲三築臺明年春城小穀故冬書不



雨閔之深也

三十有二年春城小穀

備齊也

夏宋公齊侯遇于梁丘

爲鄭報楚也齊侯不以霸主自居以梁丘近宋而先宋公

秋七月癸巳公子牙卒

慶父與叔牙同母莊公與季友同母慶父莊公庶兄也

君親無將將而誅焉牙欲立慶父弑械成故季子酈之誅不得辟兄君臣之義也使託若以疾死然親親之道也夫子書其自卒示無譏也

八月癸亥公薨于路寢

廬陵李氏曰魯十二公得終路寢者三莊宣成而已

冬十月巳未子般卒

子卒日正也不日故也子般弑而日何也穀梁曰有所見則日



公子慶父如齊

奔也何以書如王氏曰內大夫以君命適他國皆書如慶父弑子般而出春秋書之無異詞者既書子般卒則其無君命矣

狄伐邢

春秋孔義卷四

閔公

元年春王正月

不書即位亂也

齊人救邢

凡書救者未有不善者也況於伐邢者爲戎狄乎

夏六月辛酉葬我君莊公

莊公之薨至是十有一月而始葬則其故可知



矣謂子般非弒未敢以爲然也

秋八月公及齊侯盟于落姑

盟納季子也

季子來歸

曰季子賢之也曰來歸喜之也

冬齊仲孫來

來省難也

二年春王正月齊人遷陽

逼徙之也

夏五月乙酉吉禘于莊公

魯禘非禮喪未三年而舉吉祭不于宮廟而于

莊公之寢失禮之中又失禮焉

秋八月辛丑公薨

君薨必書其所此不書弒也

九月夫人姜氏孫于邾

上書君薨下書孫于邾出奔莒則姜氏慶父之

與聞乎弒明矣

公子慶父出奔莒



慶父弑君本欲代立其奔莒者魯人不容也  
陳氏曰宋萬奔陳雖殺之不書慶父奔莒雖殺  
之亦不書所以嚴佚賊之責也

冬齊高子來盟

盟立僖公也程子曰稱高子善其能恤魯

十有二月狄入衛

衛自惠公卽位宣姜淫恣失人心久矣重以懿  
公好鶴亡形已具故狄人一至而遂渙然離散  
也

鄭棄其師

曰鄭者君臣同責也



春和文集卷五

春和文集卷五

春和文集卷五

春和文集卷五

春和文集卷五

春和文集卷五

春和文集卷五

春和文集卷五

春和文集卷五

春和文集卷五

春和文集卷五

春和文集卷五

春和文集卷五

春和文集卷五

春和文集卷五

春和文集卷五

春和文集卷五

春和文集卷五





